



21-3-1998

# *siyamend û xecê*

## kurtepeyvek ji tarîxa silîva

silîva ji dewra kevin de heye  
neha jî li ser çax û dewra xwe ye

bi dehil û baxe bi çem û bi av  
ji sînga çiyê derdibin çend sîlav

timî lê buhare kulîlk û giya  
li jêrê wê deşte li jorê çiya

buhîşteke xuda ye li xakî zemîn  
berê ew bi navê meya fareqîn

ne dûre ji havîngehên ber ferêt  
bi nav û bi deng bûye bûka welêt

ji berya hezar sal meya fareqîn  
dibû dewletek serbixwe nazenîn

dema bûye dewlet bi serxwev dihat  
dibû bingeh û paytextê welat

serek bazê dostik dibû pêşewa  
ji bajarê amed heya neynewa

ji xabûr û dicle heya bê ferat  
ketî destê kurda gelê rojhilat

sed û salekê kurd dima xundekar  
li ser destê sulcoqiyên hate xwar

dîrok pir dirêje ji herdû ciya  
lê behsa me vêga li ser sêwiya

## Destpêk

Di şehrê silîvan de sêwîk hebû  
Di bin destê amoj û apê debû

Bi navê siyamend ne bav û ne da

Ne xuşk û bira, xeyrî rehma xuda

Perîşan û xwas û gurî ser bi ken  
Di axur de tim radiza ew reben

Emir bûye deh sal dima bê xwedî  
Di dinyê de rojek xwe yî xweş nedî

Tucar têr nebû ew ji nanê tisî  
Xwedê neyne jaro serê her kesî

Jin apê siba radikir ew ji xew  
Dikir herdû destan ewê nan û dew

Berê wî dida cot ku guryê qedê  
Ji apê re taştê bibî sersedê

Newêrî bi dûr baji texma derî  
Ku xelkê ji sosret didane serî

Bi çûkan didan dû bi kevr û kuça  
Ji tirsaxwe davête xort û keça

Felek malxerabê bi zêr û zeber

Li anyê nivîsandibû ev qeder

Kesê qels tu najo dibin xurte mêr  
Li wan teng meke ew dibin tayê şêr

Ji ber wan nekir der li wir 'ingirî  
Di nav wan de bû qarîş û berberî

Siyamend ji ber wan xweda hêlekê  
Ku xencereke zîvî dida kêlekê

Dikir er xwe çîpek ji çîpa devê  
Berî da xerabyê bi roj û şevê

Xerabî dikir wî bi roj û bi şev  
Ku zarok ji ber tîş dibûn ew ji hev

Li taxê diçû û dihat wek pilink  
Ku zarok ji ber tev ketin hişke ling

Ji derbê Siyamend ketin hundira  
Ji tirsê siyamend ketin axura

Êrîş tim dida wan ji herçar ciya

Bi çîpa devê geh bi kuçkaniya

Di pêre xwe berda çiyê cengewer  
Ji bajêr birîne hemî rê û der

Dibû pehlewanek dibû cengevan  
Ji bajêr ewî qutkirin aşivan

Nema kes dikarî bidî ser riya  
Nema kes ji bajêr diçî nav çiya

Li vir yek birînkir li wir guh birî  
Ker û ga û çêlek diman bê terî

Ji ber ku setem dî ji xelkê gelek  
Li dunyê tu qencî nekir pê felek

Ketin ber qelaqê ji destê gurî  
Bi xêr û xweşî ew ji wan nagerî

Wekî serxweşan ew bi cama şerab  
Didan ber hevûdû çî qenc û xerab

Ji kerbê cîhanê ji qehra demê  
 Tu qencî nekir wî bi vê alamê

Bi kîn û bi gir bû li xelkê teva  
 Bi xencereke zîvî bi çîpa deva

Firavîn û şîv tim dilê koviya  
 Şikeft xewgeha wî pilingê çiya

Şevêk raketî bû ne ilm û xeber  
 Ji nişkave xocê xidir hate ser

Bi herdû piyan wî digirt û hejand  
 Ser û pişt û qorik bi ser hev civand

Çi awir didanê wekî melkemot  
 Bi kerb û bi kîn û bi xeyd jêre got

Siyamend bese ev setem ev cefa  
 Li xelkê tu herdem dixwî van gefa

Tu xort û ciwanî kurek ber zewac  
 Ji xelkê tu distînî salyan û bac

Hebûn wek te zalim li dinyê b'sedan  
Bela xwe teva dîn ji destê xweda

Tu zilmê dikî li kesê bê gunah  
Xuda tim ji bo wane pişt û pinah

Tê ya xwe bibînî bi derd û xema  
Siyamend cihê te li vêde nema

Nema tê bi kêrî te ev war û cî  
Dibê rojhilatê ji vêde biçî

Silîva jin û mêr li te bûne yek  
Te nahilne sax bes ev zilma gelek

Eger tengezar bû bi deryê revê  
Hewar ke tu xewna di nîvê şevê

Çi wexta bixwazî ez amademe  
Metirse siyamend li pişta teme

Siyamend sibê radibû ew ji xew  
Dizanî ku raste ne xewnek derew



Bi çavin dihêstir bi dilkî şewat  
 Bi rêket berê wî kete rojhilat

Berê xwe dida oxirê çav belek  
 Li ba ket û pişta xwe daye felek

Du roj û şeva ew li gunda gerî  
 Li gundê umer beg bi şev hêwirî

Umer beg hebûn wî du hespên beza  
 Li wan pir xwedî bû ji tirsê dîza

Lehengê Siyamend peyê cengewer  
 Dibû sayîsê herdû hespên Umer

Du sala li cem ma xerîb û ne nas  
 Tena qutkî kurka bi kevnek kiras

Sibakê de dijmin bi ceng û bi şer  
 Bi qewxe bi cerdek giran hate ser

Di gunde nehiştin tu pez û dewar

Ne gicgic ne hoho li wan bû hewar

Li hespa siwar bûn li gund kes nema  
Berî dane cengê bi gurz û rima

Ji şûr û rima ew dihatine hev  
Ji toza siwara ku roj bûye şev

Siyamend siwar hat li hespet Umer  
Berî daye cengê bi hêz û huner

Di şer de bi hêç ketye mîna devê  
Hewar kirye xewna di nîva şevê

Bi çîpa devê laş kirin bê jimar  
Ku cerda giran jev kirî tar û mar

Siyamend di wê rojê pêda hemî  
Li dijmin fikir cengeke ristemî

Siwarê bi nav û bi deng serbilind  
Dida ber xwe talan berî daye gund

Xweşî ketye gund tax bi tax mal bi mal

Diçûn pêşiya wî lehengê şepal

Ku emrek dirêj gundiya jêre xwest  
Bi lîrlîr du baqê gula dane dest

Êvarê civata Umer beg gerî  
Berî da civatê bi wan şêwirî

Gelo ma sezayê Siyamend çiye?  
Ku talan ji destê neyar anîye

Civatê teva got bi heqya xwedê  
Keç ya xwe zelîxa diyarî bidê

Emê bistirên pê ji zerfê demê  
Tu mêr wek wî nînin di vê alemê

Umer beg dukes rêkirin axurî  
Ku bînin civatê wî xortê zerî

Di axur debû lev dixist ka û dêm  
Bi hespa ve bû ew bi tîmar û êm

Ji nişka ve dî ku di xortên şepal  
Li ber dergehin ew divên bêne bal

Ewî go kerem kin gelî yawira  
Ewan gote fermo dîwanê bira

Di gel wan dihatî dîwana xweser  
Bi tore dirûnişt li henber Umer

Umer gote wî pir bi xêrê tu hat  
Ji deşta silîva li me rojhilat

Bijî qehremanê bi kêr û lebak  
Pilingê hekar û çiyayê şikak

Di heqê tede min tu qencî nekir  
Gelek poşîmanîm li min tu negir

Delala xwe ya ber dilê bav û dê  
Mi da te bi qewl û resûlê xwedê

Ewî go sipasim ji te ez benî  
Zelîxa tu zanî ku xuşka minî

Eger rast dixwazî tu qencyê bikî  
 Ji wan herdû hespan bidî min yekî

Ku ez têr bibînim ji xwer vê dinê  
 Ne wexte çikin ji dewxa jinê

Ne xuşk û birame ne dê û ne bav  
 Ne mal û ne milkim ne zêr û dirav

Siwar bim li hesp têkevim li ser riya  
 Bikim kêf û seyran li deşt û çiya

Deverekê nehêlim tu cî û dera  
 Hekar û şikaka heya heydera

Ji bîr kim kul û êş derd û xema  
 Begê min tu nanê min li vî cî nema

Ji ber ku me zilm û setem dî gelek  
 Binê ka ji min wê çikî ev felek

Civat tev li halê siyamend girîn  
 Umer got çî hespî dixwazî werîn

Siyamend sibê radibû ew ji xew  
 Diçû tewlexana di hespên xwe ew

Dirêxistî hespek bi serc û bi zîn  
 Berî daye oda Umer xemcivîn

Siyamend bi tor û edeb hate dest  
 Digot: ey begê min ev yê mi xwest

Umer go: tu xêrê gelek jê bibîn  
 Pîroz û diyarî te be hesp û zîn

Diravin didayê ji bo xerciyê  
 Li ba ket berî da pesara çiyê

Li deşt û çiya ew siwarê tenê  
 Dikir geşt û seyran li sewra dinê

Xwarin ji goşt û dilê koviya  
 Vexwarin ji ava devê kaniya

Çi êmîşê dara hebû jê dixwar

Çi sêv û çî hirmê bîhok û hinar

Bi şev radiza ew di baxê'd gula  
Siba radibû ew digel bilbila

Di salê me da ger xweş e şeş meha  
Di benga buhara di havîngeha

Çi pêta dil û can hemî pê dikuşt  
Kul û derd û xem wî di dil xwe nehişt

Sibakê dirabû ji benda reza  
Siwar bû li demilqeranê beza

Berî daye gundê li binya çiyê  
Ewî dî mirovek li texma riyê

Dibakir Siyamend siwaro veger  
Ewê çûk bitirsîn ji hespê qumer

Tu gavek dî pêş bê ji te zêde ye  
Ku çûkek here ew bi xwîna te ye

Şîhîn ketye hesp cî guhestin hema

Firîn ketye çûkan li wir yek nema

Êrîş da Siyamend Qeregêtiran  
Bi çogan dihatê bi şerkî giran

Siyamend peyabû bi çîpa devê  
Hewar kirye xewna di nîva şevê

Berî dane hev wekî gurêd devbixwîn  
Bi çogan û çîpa devê bû reqîn

Ketin pêx û ber çeng ji herçar کنار  
Wekî cengê rustem û esfendeyar

Bi nigdanberê geh bi rîp û bi fen  
Siyamend li erdê dixist ew reben

Wek hûto dihatî xwe lê kir bele  
Du hilfa negirt xwe li ber wî mele

Siyamend wek boxê birîva bi deng  
Berî daye boxê silo beg bi ceng



Li şehrê nisêbîn gihiştine hev  
 Hihatine hevûdû ne tirs û ne rev

Hevûdû bi navê digirtin bi dest  
 Lê boxê silo beg ji ber wî şikest

Siyamend dibû serfirazê demê  
 Dibû qehremanek li wê alemê

Qeregêtiran ew lehengê mezin  
 Tu qedr û tu rûmet ne ma wî ji bin

Ewî go Siyamend nebînî mi kêş  
 Ku carek heye ez bi kêrî te bêm

Bi destê mi bigre ji erdê mi rak  
 Were em bi hev re bibin destbirak

Siyamend bi dest girt û rakir piya  
 Bibûn wek birayên ji bav diya

Qeregêtran go bi soz ez benî  
 Birayê biçûkim tu meznê minî

Ne bav û ne dê me ne xuşk û bira  
Xerîb û nenasim bi xwe l'van dera

De fermo bi min re birayê delal  
Gelek westine ku em herne mal

Keç û xort li dor wan dikirne xelek  
Bi hev re berî dane birca belek

Çi xanîkî xweş pir dirêj û fire  
Ji Qışla silo beg gelek xweştire

Wek eywanî kesra bi neqş û nîgar  
Bi dehl û bi baxe ji herçar kenar

Xelatê felek pê kişandî qlem  
Di mizgîn de nayê buhişta îrem

Ji birca li babil qiyas girtiye  
Kela dimdimê xan ji ber vê çiyê

Nizanim çi bêjim çi pesnî bidim  
Wekî şehneşîna paşayê ecem

Ketin hundirû ew ji hêla derî  
Siyamend rûnişt û l'xanî nerî

Şewityû ne xana xwedê be dilo  
Bela sed qeda bê li xaniyê wilo

Ne derge ne pencer dirêjî du gav  
Ne kunc bixêrîk ne cîcerk û av

Ne arvan û dane ne nîsk û kewar  
Ku terya du mişka de lê nabe ar

Ne serşok û risil û kulîn û nivîn  
Ne tas û beroş û ne teşt û misîn

Tu cil têde nînin ne merş û kulav  
Çi erdek herî tev dilop û çirav

Du cewrê sega tê dîkin warewar  
Nerîna pisîkan bi qîr û hewar

Li hundir girêdaye tajîk bi cil

Refê kêş û mêşa li ser poz û mil

Reş û tariye qet ne rok û ne ba  
Ne bihna buharê ne sura siba

Hema rabû serxwe wekî dîn û har  
Ser û ban bi ser hevde anîne xwar

Bi destê wî girt û dida ber xwe ew  
Ji wî re kirî hespekî pir bedew

Li hespa siwar bûn ji kêfa dila  
Berî dan şikak û hekar û mila

Digeryan li nava eşîrên giran  
Li cibra û zîla heya heydera

Vegeryane paşê siwarêd lebak  
Berî dane êl û êrîşa şikak

Dema daketin ew ji jora çiyê  
Ku hepê xwe av din li ser kaniyê

Li rê dîn keçek pir çeleng û bedew  
Cerek av li mil ber bi malê ye ew

Siwara didan dû heya ber derî  
Xecê ketye hewşê li wan zîvirî

Kermkin peyabin gelî cindiyan  
We kêşaye zehmet li ser van riya

Xuyane mêvanin xerîbin ji dûr  
Kesin aşîxwazîn neyêd gurz û şûr

Bi ehla û sehla û gelkî bi xêr  
Li ser çav û gava siwarên bi kêr

Peyabûn berî dane birca bilind  
Çi dîwaneke xweş li baxerbî gund

Bi xalîçe raxistiye gem bi gem  
Ber û cil seraser ji neqşê ecem

Dîwar tev bi resmê piling û şepal  
Pozê kovî û şêr û xişfêd xezal

Ji herçar kenara xuyane li wir  
 Sitêrkên zeberced û elmas û dir

Rûniştin li ser wan cilên rengereng  
 Kulav û dîbacêd bi nav û bi deng

Xecê xwarn anî di wê se'etê  
 Bi pozê çilagî bi bejneke zirav

Bi çeplên dirêj û bi keys û fesal  
 Hiş û aqlê wê dimaye li bal

Dema hevdû dîtî ji hev tîr nebûn  
 Di çola evînê de winda dibûn

Evînî li wan xweş dibû wek şekir  
 Ku meyla dila pir li wan zêde kir

Îşaret bi çavan didan herduwa  
 Bi hev dane zanîn evîna xwe wa

Bi dîlkî melûlî xecê hate mal  
 Evînê bi wê ra nehiştî tu hal

Xecê dê û bav û bira tev birin  
Ewê tev bi hevra didan naskirin

Dibê wek ji malêne herdû bira  
Bi xwarin vexwarin bi çûna dera

Xecê bes tenê dibnisî roj bi roj  
Ku eywan û hundir li wê bûne doj

Ji pêta evînê dibû tengezar  
Evînê hilandî ji wêna du par

Dibê rojekê herdiwa hev didîn  
Xecê go: Siyamend were mi'b revîn

Siyamend digot: ey keça beglera  
Kuramên te heftin xuha çar bira

Şikaka eşîrek girane xecê  
Nikarim ji te ez dikim vê recê

Tu xweş zane ez û Qeregêtiran

Xerîbin di nava eşîrek giran

Ji ber ku me nîne tu cî û tu war  
Xelasya me nîne ji ber wan tucar

Xecê got: metirse berî rojhilat  
Xwe bavêne bextê sîpanê xelat

Li xanê lewenda li qafê çiyê  
Emê bistirin tev ji ber gaziyê

Timî berf û baye timî lê mija  
Stara firara cihê mêrkuja

Derabin xwe karkin bi hêla xwedê  
Emê tevde îşev gihên meqsedê

Ji çek û silahên riza beg du şûr  
Hilanîn ji bo wê riya tirs û dûr

Tîmar kirne hesp wan ji bona revê  
Xwe karkirne wêga biçin wê şevê

Ku reş ketye erdê ketin ser riyê



Bi sarya sibê re gihiştin çiyê

Bi roj hilkişîn rê bi teht û kevir  
Gihiştine xanê lewenda esir

Timî berf û baye timî sermeye  
Bi şev hêwirîn tev li mala keye

Sibê rojhilat wî keyê şareza  
Zevîk da siyamend li textê reza

Bi serhevde anîn du xanê bi hewş  
Digirtin bi mircaq û pûş û bi kewş

Ji nû mehr birîne bi reqs û cîfat  
Xecê bû kevanî li kohê xelat

Siyamend dima ew bi tîr û kevan  
Qeregêteran haris û dergevan

Mijûl ma Siyamend bi nêçîr û rav  
Li pê koviyan cî bi cî gav bi gav

Siyamend sibakê li texma çiyê  
 Ji nişka xezalek ketî pêşiyê

Xezalê ji tirsê xwe berda ji kaş  
 Revî ber bi jêr ve siwar ma li paş

Siwar sertêdanî li vir geh li wir  
 Hetanî bi esrê tu çiq pê nekir

Ji esrê û pêve çiqasî nerî  
 Ji ber çav ketî ew xezala berî

Ji nişka siwarek xuya bû bi zîn  
 Berî da siyamend bi kerb û bi kîn

Ji dûr ba kirê ho kesê bê mejî  
 Li çî xwed gerî tu li çola bejî

Tu napirse carek çî rast û derew  
 Gelo ev dever ma cihê kêye ew

Ku rojek ji emrê te mabî gelek  
 Ku bavê te be Qehremanê felek

Êrîş dane herdû bi şerkî mezin  
Bi şûr û rima geh bi gurzên hesin

Bi navê dilîstin bi kîn û bi gir  
Neyarê Siyamend li wî zêdekir

Ji hawhaw diket ma bi çavê revê  
Ji nû hate bîra wî xewna şevê

Derîkî ji xêrê xwedê lê vekir  
Ji nû ve hewar kirye xocê xidir

Siwar lê nema bû tu hêz û qewet  
Wekî termekî ew di bin wî diket

Esîr ma di destê Siyamend hejar  
Bi wî dixwest ser bikî lê du par

Mexabin didî qîzeke domizî  
Bi cotek guhar û bi bisk û kezî

Şûr avête ji dest xwe bi hêz û huner  
Li min be bi qîzkêr dikim ceng û şer

Ne ez bim ne navê min be ey gurî  
Sed ax û xewlî bê li nava serî

Ewê gote: xorto xwe gelkî nebîn  
Mi pir wek te gêr kirne xakî zemîn

Te zora min ne dibir pilngê xelat  
Lê xocê xidir zû di hana te hat

Elîfa bi nav û deng im gurî  
Li şûrêm nivîsandiye sed mirî

Çiqasî tu mêr be ne tayê minî  
Du'a bik ji xocê xwe re ez benî

Gelek dîl û hêsîr li nik min hene  
Ku dexmam li enya pirê wek tene

Derabe digel min ku em herne mal  
Bi çavê tevda bibîn ey heval

Bi hev re dihatin şikeftê mezî

Fireh û dirêj e ne ser û ne bin

Civatek dixun têde goşt û girar  
Di dawya şikeftê de pez û dewar

Siyamend li wê der dima wê şevê  
Bi sehw û bi tirs û bi çavin revê

Elîfê sibê radibû rojhilat  
Ji xew radikirin yek bi yek ew civat

Digot ev dewar û pez û van pera  
Di nav hevde parkin hemî wek bira

Esîrêd minin hûn heyânî niha  
Berî bidne malên di xwe hûn reha

Gumîn ketye wan girtiyên mah û sal  
Helal dane ber xwe berî dane mal

Elîfê û Siyamend didan ser riyê  
Berî roj biçî xwar gihiştin çiyê

Li xanê lewenda dibû şademan  
Elîfê didane Qeregêteran

Demek xweş bi here buhartin ewa  
Bi nêçîr p seyda evor û kewa

Di kêfê dene lê nizanin gelek  
Li ser wan çi tiştî drêsî felek

Felek xayine her dem û gav û wext  
Ne ol û ne dîne ne soz ne bext

Xwe jê vegre dosto gelek koneye  
Heval jêre nînin li ber a xwe ye

Xwe nespêrê jaro bi dil paqijî  
Bi yek awira tûj ewê teb kujî

Piyala li ber wê tijî tim li dev  
Ji xwîna me vedxî bi roj û bi şev

Timî serxweşe ew bi wê badeyê  
Tucar têr venaxwî ji wê madeyê

Tucarê tu bawer mebe pê temîn  
Gelek xapînoke bi gir û bi kîn

Ji dewra kevin dijmin e ne jniha  
Ji kewna berê de bi sal û meha

Dikî şev dikî roj bi kêfa xwe ye  
Demê ku diçin tev ji emrê me ye

Gelek şareza ye bi weyn û bi fen  
Bi hîlên xwe dersê didî ehrîmen

Xwe parêz ke jê ey birakê gurî  
Hevaltî bi kes re ne bir ye serî

Sibakê li madê xecokê nerî  
Çi ta'l û ne xweş çav bi hêsr û girî

Siyamend digotî xeca min çima?  
Cihanê xerakim bi gurz rima

Ez saxim li dinyê tu bigrî wisa  
Bela min neçî ber derê her kesa

Dilopek ji hêsrê te nadim timî  
Bi milk û bi malê cîhanê hemî

Bi qehr û girînê xecê gote wî  
Elîfê ji min re bûye wek hewî

Dibêje tu xwestya begê heydera  
Tu qîza riza beg xuha çar bira

Te terka teva kir te da dû gurî  
Te qîma xwe anî bi vî serserî

Şikaka hebûn têde xortên lewend  
Hemî xanedan û hemî dewlemend

Kuramên te heft bûn bi nav û bi deng  
Di cenga neyaran de şêr û piling

Te da dû evê dev genî û çepel  
Timî ser di ber de gurî çavnexel

Du kaşone lingên di wî serşepî  
Ku bin çeng û pêşîr bi rişk û sipî



Tu çawa bi dû ket xeca bê mejî  
Kuramê xwe hiştin birayêd xwe jî

Siyamend ji nişka wekî melkemot  
Sivik da xwe çav lê dibûn wek pizot

Ji qehra kekê xwe û elîfê, gurî  
Bi lahor serê herdiwan pê birî

Di pê ku dikuştin dimane tenê  
Di çav wî de reş bûye rewşa dinê

Sibê zû siyamend berî da çiyê  
Mexabin nizanî çi tê pêşiyê

Bi nêçîr û seydê diket nijdevan  
Birîn kirye kovîk bi tîr û kevan

Birîn germ bû kovî ji ber kulkulî  
Birîn sar dibû lê li texma gelî

Belengazê kovî ketî wê derê

Siyamend gihayê dida xencerê

Ji ber jan û êşê li hev wegerî  
Xwe tev da quloç ket pêsîra Gurî

Li hev duqlipî hêz dida çar kenar  
Siyamend ji jora gelî hate xwar

Di piştê de rabû dinîva gelî  
Xîpek darbi'êv bostek û çar tilî

Di wexta ecel bê çî roj û çî şeb  
Xuda jêre tiştî dikî wek sebeb

Ecêba serê heft ecêba were  
Nêçîrva bi destê nêçîrê here

Ev e hukmeta vî xwedayê mezin  
Surek kûr û dûr ji dewra kevin de

Ro hatî delava ji seydê nehat  
Xecê şop gerandî li kohê xelat

Li rast û li çep geh li jêr û li jor  
Xecê hate ser term û laşê evor

Didî nalenalek ji jêre gelî  
Siyamend li ser dareke sê gulî

Di piştê de xîûek çilo çoye xwar  
Dinalî mexabin ne han û hewar

Xecê da girî çav dibûn wek pizot  
Li ser halê xwe û siyamend digt:

Heware heware siyamend hewar  
Heware me dûre şikak û hekar

Heware li êl û eşîra mila  
Li kîka û mîr û begê gurdila

Heware li kurda li cerda giran  
Li zîla û cibra û heya heydera

Li hûtê binê behra wanê hewar  
Li şêr û pilingêd sîpanê hewar

Bi hevî ji tevda dikim vê recê  
Hemû bên di hana qijoka xecê

Siyamend digotê xecoka mi bes  
Ji sîpan di hana me nayên tu kes

Dikim kêferatê li ber vî rihî  
Tu bigrî tu negrî qeder namihî

Tu daw û delingên xwe hildî xecê  
Ji saxya min êdî neke qet recê

Berî bid şikaka li xan û serê  
Xwe bighîne mala xwe ya wek berê

Tu hêja ciwanî bibînî yekî  
Ji dêvla Siyamend ji xwer xortekî

Tu sal û zemanên di xwe ey delal  
Bibuhrîn tu vêra bi zarok û mal

Ku lawek te çêbû xeca çav belek  
Du dengê bilîlîn ji kerbê felek

Di nîvê çeva de dema azirî  
Bi dergûşê bigir û biheşîn perî

Binuhrîn tu pêre bi dilkî birîn  
Siyamend li sîpan di bîra xwe bîn

Felek mal xerabê serî l'me gerand  
Ku destê me herduwa ji hev raqetand

Li dinyê gelek em bi hev şa nebûn  
Viyane me badî hewa tevde çûn

Xecê go: Siyamend bi sûnda mezin  
Bi navê xwedayê hemî ins û cin

Herambî li canê mi kevne jinê  
Di piştî te re mîr li darê dinê

Pepûka ewê kêferatê ez im  
Qijoka sîpanê xelatê ez im

Sîpanê xelatê bi berf û bi ba

Cih û peygera wehş û hov û teba

Hewar kim li dar û berê van çiya  
Li hova teba lê ji bil koviya

Erê koviye malxerabo çima?  
Te hiştim di nîva kulan û xema

Siyamend revandî ji ber vî dilî  
Ji kerba te avête nîva gelî

Erê dar bi'êvê tu bû melkemot  
Te kuştî Siyamend te cergê min sot

Menale Siyamend bi gorî menal  
Xerîba welat im ne ap û ne xal

Felek wax li serê min geryaye bes  
Tenê bê xwedî me ne kûs û ne kes

Berê bi ku dim xeco porkurê  
Bi şerm û fihêtim ji bav û birê

Mitala meke ez dêrana te me

Xwe bavêm gelî ez mêvana teme

Siyamend digotî: xeca min mebêj  
Ji çavên belek hêsrên bes birêj

Xuda ku çi deyne li enya merî  
Çi dût û çi nêzîk ewê bê serî

Bela min girane dilêm najenî  
Çi xwîna ku tê xwar ji laşê min î

Ji bona mi jarî xwe mek can fida  
Dikim va herim ez diyarî xuda

Qûnaxa min dûre li min bû dereng  
Xwe navê gelî vî cihê kûr û teng

Reca min ji te bes bikî leclecê  
Tu goram bikolî li vî cî xecê

Li ser min bişîrşîr kin teyr û tulûr  
Di gel dengê qaz û qulingan ji dût

Siba bê min dengê bilûra şivan  
Digel qeqeba kewribatê zeman

Li dor min biçînê ji hewdê gula  
Li ser min birêsin refêd bilbila

Bila darbi'êv tim hebe sê gulî  
Bi navê Siyamend bimînê gelî

Wê dara mirada be ev dar bi'êv  
Evîndar li dorbin bi roj û bi şêv

Weha got û êdî nema dev gerî  
Mexabin Siyamend li wî cî mirî

Xecê kirye fixan bi ax û keser  
Ji jora çiyê wê xwe avête ser

Ji hiş çû bi carek nema bû qewet  
Li ser term û laşê Siyamend diket

Xwe himbêzî hevdû kirin mêr û jin  
Ruhê xwe sipartin xudayê mezin



Berî dan cihê heq ji dunya betal  
Li pê xwe ne hiştin tu milk û tu mal

Li xanê lewenda dibû berbere  
Gelek por li ser wan diçûne pere

Di qurmê bi'îvê ewa sêgulî  
Ku herdu veşartin di nîva gelî

Dibûne ziyaretgeha dilgiran  
Dibûn serwerê 'aşiq û dilberan

Gelî ma ji sal û zeman û meha  
Bi gelyê Siyamend hetanî niha

Buhara bi şîn vedibe ew sê gulî  
Kulîlk digirnê pir wek ax û xwelî

Bi emrê xuda kovî û ew evor  
Ji darê dixwun wan kulîlkên di sor

Ji ber vê yekê dar timî bê bere  
Ku nagrî bi'îvan melûl û zere

Surê vê cîhanê xerîbin bira  
Kitêb têde nadî xeber eşkera

Kuta bû dîroka gurî û xecê  
Belê ez ji xwenda dikim vê recê

Dizanim bi xwe şaşiyên min pirin  
Li ser min nekin bar di min bibhurin

Meriv kême yezdan çîqa hiş bidê  
Kemal nîne xeyrî kemala xwedê

Çi tiştê ji min hat ev e yê me got  
Emir min di karê edeb de firot

Me qîma xwe nanî bi malê dinê  
Ji ketme warê nivîsandinê

Xecê û Siyamend wekî Mem û Zîn  
Me xistin dîrokê berî bên dizîn

Ne firsîn ne tirkin ne jî ermen in

Ji koka xwe kurdin tarîxa menin

Dibêjin çiyayê şikak û silîv  
Ji kevin de ne me'dena zêr û zîv

Bi serhatiyên me gelek berze bûn  
Hiyamin dirêj ku di ser wan re çûn

Çi bibhîze deyne kekê xwendevan  
Berî jê bibûrin tu wext û zeman

Me parêz ke yezdan ji yên zik direş  
Me tevda bidî ser riya rast û xweş

Tîrêj tim berê wî bide qencyê  
Tu rehber bî jê ra heya dawiyê

[www.tirej.info](http://www.tirej.info)

Rêzkirna tîpan:  
Ibrahim Heso  
nevyê seydayê tîrêj

